

## AAQQIISUT

Aalajangiussassatut siunnersuut 27. februar 2012-imik ullulernerqartoq taarserpaa, siunnersuutip aalajangiussassatut siunnersuutitut oqaasertalersornissaata kinguneranik teknikkikkut iluarsineqarpoq.

Inatsisartut malittarisassaanni § 33, imm. 4 naapertorlugu aalajangiussassatut siunnersuut tulliuttoq saqqummiunneqarpoq.

**Aatsitassarsiorfinni isumannaallisaaneq peqqissuserlu pillugit ILO-p isumaqatigiissutaanut nr. 176-imut Kalaallit Nunaata ilaatinneqarnissamik kissaatigarneranik Kalaallit Nunaanni Namminersorlutik Oqartussat nalunaaruteqarnissaat pillugu Inatsisartut aalajangiiffigisassatut siunnersuut.**  
(Inuussutissarsiornermut Aatsitassanullu Naalakkersuisoq)

### Tunngavilersuut

Aatsitassarsiorfinni isumannaallisaaneq peqqissuserlu pillugit isumaqatigiissut Naalagaaffiit Peqatigiit ataanni sulineramik inuussutissarsiteqartut nunat tamat akornanni kattuffissuannit ILO-mit 1995-imi akuersissutigineqarpoq. Nunani ILO-p isumaqatigiissutaanik atortussanngortitsisimasuni, aatsitassarsiorfinni pissutsinut ulorianartunut sulisartut tunuarsinnaatitaapput.

Danskit ILO-mut ataatsimiititaliaanni apeqqutinik pingaaruteqartunik ILO-mut tunngasunik ataqatigiissaarisutut suliaqartumi, aatsitassarsiorfinni isumannaallisaaneq peqqissuserlu pillugit ILO-p isumaqatigiissutaanut nr. 176-imut Danmark akuersissanersoq oqaluuserineqarsimavoq. Danmarkimulli kisimiilluni taamatut iliornissaq attuumassuteqarpallaassanngilaq, Danmarkimi aatsitassarsiorfinnik ingerlatsisoqanngimmat.

Folketingip Nukissiuuteqarnermut ataatsimiititaliaani februar 2011-imi taamanikkut naalakkersuisuusunut apeqqutigineqarpoq, isumaqatigiissutip nr. 176-ip akuersissutigineqarnissaa sulissutiginiarneqarnersoq. Sulisoqarnermut Ministerip taamanikkut piffissami tamatumani atortussanngortinneqarnissaa sulissutiginiangilaa. Taamaattoq EU-mi malittarisqaqartitsinikkut isumaqatigiissummi aalajangersakkat arlaqaqisut atuutsinneqarput.

Kalaallit Nunaanni aatsitassarsiorfeqarmat, maanngaanniit kissaatigisinnaavarput Naalagaaffik isumaqatigiissummik akuersissuteqassasoq.

Kalaallit Nunaanni nunami sullivimmi avatangiisit inatsisiliornikkut oqartussaassuseqarnikkullu suli danskit suliaqarfigigaluaaraat, Kalaallit Nunaanni Namminersorlutik Oqartussat isumaqatigiissummut ilaajumanerminnik pisortatigoortumik nalunaaruteqarpata Sulisoqarnermut Ministerip eqqornerusutut isigisimavaa. Tamatuma kingorna isumaqatigiissutip akuersissutiginissaanik aalajangernissamut Danmark tunngavissaqarnerulissaaq. Taamattumik sulisoqarnermut ministereqarfiup tamatuminna nalunaaruteqarnissaq qinnuteqaatigisimavaa.

### Isumaqatigiissutip imarisai

Pissutsit isumannaallisaanermut peqqissutimullu tunngasut assigiinngitsut isumaqatigiisummi allattorsimapput. Sulisitsisup akisussaaffii ersarissagaapput, assigisaanillu sulisut pisinnaatitaaffii pisussaaffiilu ersarissagaallutik. Pitsaaliuinermik iliuitsit illersuutitullu iliuitsit ilaatinneqarput. Tamatuma saniatigut sulisitsisut sulisullu suleqatigiinnerisa siuarsarneqarnisaannut tunngasumik immikkoortumik ilanngussisoqarsimavoq.

Isumaqatigiisummik atortussanngortitsinikkut, nuna atortussanngortitsisoq aatsitassarsiorfinni isumannaallisaaneq peqqissuserlu pillugit anguniakkanik ataqatigiisunik piviusunngortitsissaaq, piffissallu ingerlanerani anguniakkanik aalajangersumik piffissalersugaamik iluarsartuusseqqittassalluni, taamaasiornikkut isumaqatigiisummi aalajangersakkat piviusunngortinnissaannut pingaarnerusumik siunertaralugu.

Isumaqatigiisummut atatillugu inassuteqaat suliarineqarpoq. Aatsitassarsiorfinni isumannaallisaaneq peqqissuserlu pillugit inassuteqaat nr. 183. Isumaqatigiisummi aalajangersakkanik inassuteqaat tapersiivoq, ilaatigullu aatsitassarsiorfimmi pitsaaliuinermik illersuinermillu iliuitsit pillugit aalajangersakkanik imaqarluni.

### **Aningaasatigut kinguneri**

Isumaqatigiisummik akuersissuteqarnikkut naatsorsuutigineqassaaq Namminersorlutik Oqartussat ataatsimiinnernut peqataatsitsinernut kiisalu inatsimmik malinnaatitsinermut qularnaarinermillu aningaasartuuteqarnerunermik tamanna kinguneqassasoq. Aningaasartuuteqarneruneq tamanna maannakkut aningaasaliissutaareersutigut pisinnaasutut nalilerneqarpoq.

### **Attaveqatigiinneq**

Inuussutissarsiornermut Suliffeqarnermillu Naalakkersuisoqarfik isumaqatigiisut pillugu Danmarkimi sulisoqarnermut ministerimit saaffigineqarnikuvoq.

### **Tusarniaaneq**

Isumaqatigiisut SIK-mut, GA-mut ICC-mullu tusarniaassutigineqarpoq. ICC oqaaseqaatinik apuussivoq, Kalaallit Nunaatalu isumaqatigiisummut ilaalernissaa taassuma erseqqivissumik kaammattuutigaa. Kalaallit Nunaanni aatsitassarsiornerup siunissami annertuumik ingerlanneqalersinnaanera ICC-mit tikkuarneqarpoq, tamannalu pissutigalugu aatsitassarsiorfinni sulisut sullivimmi avatangiisitigut qulakkeerinniffiginissaasa qitiutinneqarnissaat aatsaat taama pingaaruteqartigaluni. SIK Namminersorlutik Oqartussanut siusinnerusukkut attaveqarsimavoq, Kalaallit Nunaata isumaqatigiisummut ilaalernissaa kissaatiginartutut nalunaarutigalugu.

Aatsitassarsiorfinni isumannaallisaaneq peqqissuserlu pillugit ILO-p isumaqatigiisutaanut nr. 176-imut Kalaallit Nunaanni Namminersorlutik Oqartussat ilaatinneqarnissamik kissaateqarnerannik Inatsisartut aalajangiissasut Naalakkersuisut maanna inassuteqaatigaat.